

**Ubutumwa Yezu Kristu yahaye Nyiramukiza Valentine bujyanye n'iki gisibo no gusiba kwe kuva ku itariki ya 09/03 ya buri mwaka mu gisibo. Tariki ya 08/03/2022, saa cyenda n'iminota 25 z'ijoro (03h25)**

**Yezu Kristu** : Nyiramukiza mwana wanjye nkunda.

**Valentine** : Karame Papa.

**Yezu** : Ba uhagaritse gato isengesho ryawe ubanze untege amatwi yombi nkubwire ikinzanye muri iri joro, urakomerezaho nyuma.

**Valentine**: Yego Papa, ndi hano nguteze amatwi yombi ngo nkumve, nkumvire, untume aho ushaka no ku bo ushaka, nkore ugushaka kwawe kuko ndi igikoresho cyawe.

**Yezu**: Ikinzanye muri iri joro, icya mbere ni iki: Ariko untege amatwi ndakikubwira neza nyuma. Iki gisibo, ejo ntuzasiba nk'uko wabikoraga.

Dukomeze kuko nzanywe na byinshi.

Senga cyane ubishyizeho umwete kuko ibintu birakomeye, isi igeze aharenga n'abayituye bageze aharenga.

Ni yo mpamvu nkubwiye ibi kandi nakwibutsaga inshingano yawe mwana wanjye.

Ugiye kubabara kurushaho kugirango umfashe gukiza isi nk'uko ari byo nagutoreye kandi ni bwo butumwa bwawe, mwana wanjye, urabizi.

Ububabare bugiye kwiyongera ku mubiri no ku mutima kuko ab'iyi si bafite imitima inangiye kandi amakuba arushaho kwiyongera.

Isi igiye kubagwa ho ariko ntibahumuka ngo bumve basenge.

Ibi byose byaravuzwe none rero ni yo mpavu nje kuguteguzwa ko ugiye gutotezwa kugirango ibi biza birimo kuyogoza isi bihoshe kandi bigabanuke, kuko birakabije mwana wanjye .

Nkubwire! Iyo ntakinga ukuboko kwanjye ngo mposhe ubukana bw'ibyo byorezo byagwiriyeye iyi si muba mwarashize.

Ni yo mpamvu nawe uzahura na byinshi bigutunguye kandi bibabaje kugira ngo dutabare iyi si, ariko uzabyakire wihangane, nutotezwa na byo uzabyakire usenge, ubabarire ubikuye ku mutima nk'uko ubisanganywe mwana wanjye.

Ariko uhumure nzakuba hafi kuko ntibyoroshye kandi ntibizoroha.

Usabire abantu benshi bari muri iyi si y'umwijijama bakunda ibintu kurusha abantu kandi bizashira, bazabisiga kuko ntawe upfa ngo ajyane na byo.

Urabyumva?

Ugiye kubabara cyane usabira Kiliziya ngo ihumuke ihamagarire abakristu bose kureka ibyo barimo, maze ibashishikarize gukora isengesho mpuzamahanga mu mpande zose z'abatuye iyi si barwanya ibi bibi byose biyugarije biri kwica abantu, biganisha ku kurimbura Kiliziya yanjye ngo bimike ibigirwamana by'amashitani byabo.

Iryo sengesho rihuriye hamwe rizatuma shitani itsindwa maze byose bigashira.

Ndabizi ko ubabara ariko ntaho urageza kuko bucura abwirwa byinshi, yerekwa byinshi: ibyabaye, ibiba n'ibizaba byose akaba ariwe ubishakira ibisubizo afashijwe na Twe twamwiyeretse, tumutuma ku bantu b'iyi si.

**Valentine:** None se Papa, ko unteye ubwoba bwinshi cyane, nnyewe se nakora iki? Ibyo kuri iyi si se bimeze gute? Nzababara Kiliziya gute? Mu buhe buryo kurusha uko nyisabira buri muni? Ubwo se nzababara kurusha uko mbabara ubu ngubu ? Nzagufasha gukiza isi gute? Intambara se nazo zizahita zihagarara ningufasha ?

**Yezu :** Ntega amtwi neza ngusobanurire mwana wanjye.

Humura wigira ubwoba kuko ni Njye mbukumara sinabugutera rero.

Iyi si abayituye bameze nabi. Ni yo mpamvu nakubwiye ko ugomba kubabara.

Kubabara nshaka kuvuga ni uko wowe ari cyo nagutoreye, ari bwo butumwa bwawe bwo kubabara mu mwanya w'abandi kugirango umfashe kubakiza no gukiza isi.

Uti: Gute? Kubabazwa, gutotezwa, guhemukirwa n'uwo wagiriye neza, kugusebya, ibinyoma, kukurwanya... Byose ni imibabaro n'ibitotezo kuko Na Njye narababajwe, ndatotezwa cyane kugeza mvuyemo umwuka.

Kukwihakana no kukugereka ho ibibi byose ntugire ikiza na kimwe kikuvugwaho na yo ni imibabaro imunga igakomeretsa umutima .

Akarusho: kubabara mu mwanya w'abandi cyane cyane no muri abo bagutoteza ukababara mu kigwi cyabo. Ikivuna ni ukubyakira ukababarira ako kanya kandi nta mbabazi usabwe ubikuye ku mutima, ntubike inzika kuko inzika ni yo umwanzi shitani ategeramo abantu ababuza amahoro ngo barakare bamarane. Uranyumva neza? Ngubwo ububabare bukurenga ukaremba.

Gusabira Kiliziya rero nkubwira, mwana wanjye, ntibyoroshye kuko ntibakumva bamwe na bamwe, ntibakwemera kubera ko ibyo ngutuma ngo ubabwire bibatera ubwoba bwo kurekura ibitari ibyabo. Abo ni bamwe muri bo.

Naho Kiliziya nini igizwe n'imbaga nyanwishi y'abemera, mwana wanjye, iyo ni yo ngusaba gusabira kuko yugarijwe n'amakuba ayisenya, ayirimbura kuva mu mizi yayo, bakaba batabibona, babona imbere yabo gusa ntibarenze amaso ngo barebe hirya no hino habakikije. Ngiyo Kiliziya ugiye kubabarira, mwana wanjye.

Ndashaka Kiliziya y'ubumwe n'ubwiyunge ishyize hamwe, ihuriye kuri Roma ku kicaro gikuru cy'umutima wanjye.

Ni yo ugiye gutoterezwa, ukababara cyane uyisabira ngo ihinduke ikorere mu kuri kubereye bese nta nyungu. Aho uranyumva neza mwana wa?

Gusabira isi yose ntubone n'akanya na gato kawe ko kuruhuka, kurara amajoro usenga ntusinzire na byo ni imibabaro kuko uba uri kumwe na Njye dutakambira isi. Humura sinzagutererana mwana wanjye.

Urukundo rujye ruganza urwango n'inabi, kandi ujye ukunda abantu bese utarobanuye. Nguko kumfasha gukiza isi. Uzakunde abanzi bawe, abakene, abarwayi, abababaye, imfubyi, abapfakazi, mbese indushyi zose n'abandi bazaza bakugana bese. Nguko uko ugomba kumfasha gukiza isi mwana wanjye.

Naho iby'intambara ziterwa no kubura urukundo nyarwo mu mitima yabo yo gukunda abandi ahubwo bagakunda iby'isi, ibyamirenge, inzangano, amashyari no kwifuza iby'abandi batanzezwa n'ibyabo baruhiye ngo bibahaze, ahubwo harimo ubugome agasuzuguro n'ubwibone.

Ni yo mpamvu nakubwiye ko intambara ikomeye iri mu mitima y'abantu. Rero kumbaza niba intambara zizahita zihagarara numfasha kubabara!

Ubu ni ugusenga cyane kugirango nyine abantu basobanukirwe bumve ko umuti w'ibibazo atari intambara zimena amaraso y'abantu, kuko Njyewe intambara ikomeye nshaka ko umfasha gusengera ni iri mu mitima y'abantu. Ni ibyo nsaba buri gihe kandi ni ibyo ndwanya kuva kera.

Ngibyo ibyo ngusaba kubabarira no guhongerera mwana wanjye.

Ibyo byose nakubwiye na Mama Bikira Mariya yarabisabye, abisaba buri muni kandi abivugaho kenshi ko gusengana urukundo ari wo muti wa byose. Abantu nibakundana by'ukuri, isi izagira amahoro, intambara n'ibindi byuririzi byose bishire. Uranyumva neza ?

**Valentine:** Urakoze cyane Papa. Unsobanuriye neza ndumvise kandi unyibukije byinshi kandi ndanyuzwe.

None se Papa, buriya Kiliziya ya Roma uvuze, kuba ikicaro gikuru cy'Umutima wawe bishatse kuvuga iki? Ntabwo nsobanukiwe .

**Yezu:** Kw'isi hariho intebe imwe gusa ihurirwaho na bose nicajeho Petero, intumwa ya mbere, ayoboye urugaga rw'abakristu. Ni ho honyine hari urufunguzo. Papa watowe ni we wicara mu mwanya wa Petero kuri iyo ntebe. Papa ni we ugomba kurengera imbaga nyamwishi kw'isi yose abahumuriza.

Ni yo mpamvu ngusaba gusenga cyane mu mibabaro myinshi ngo usabire Papa n'abamwungirije, ngo bahumurize abantu bihebye, babahamagarire gusengera hamwe isengesho rihuriyeho na bose kw'isi yose bakareka ibyo barimo kuko isi imerewe nabi.

Ibyo ndabizi ko uzabizira ariko ni ko kuri, kandi nutotezwa ntuzinube uzabyakire ariko umfashe gukiza isi. Nzaba ndi kumwe na we turwanirira ukuri n'ukwemera muri Kiliziya yunze ubumwe bw'abakristu. Noneho urasobanukiwe neza mwana wa?

Ni yo mpamvu utotezwa n'abari muri za Kiliziya kugirango baburizemo umugambi wanjye wo gukiza Kiliziya irimo abantu bamwe na bamwe babeshya ko biyeguriye Imana kandi ari ukubeshya .

Harimo abakurikiye inyungu, amashuri, icyo bari cyo, ubutegetsu, harimo n'abashinzwe kubabaza, gutoteza abandi, munyangire, mbese harimo ingeri z'ibibi byose zitabonwa n'abantu, zitabonwa na bose.

Ariko ibyo byose ndabibona ni byo bimpoza ku musaraba buri gihe. Urumva rero ko iyo mbivugira muri wowe bishinja benshi kandi bikabajegaza kuko bimenyekanye, mwana wanjye nkunda Nyiramukiza !

Batazajya bakwitiranya ibyo ngutuma bikandikwa, bikavugwa ku wundi kubera kwanga kuvuga izina ryawe ku byo nakubwiriye i Kibeho. Kandi byarakozwe, ibyo mvuga ndabizi, byarakozwe biremezwa. Ni agahinda!

Ni yo mpamvu naguhitiyemo umunyamahanga utamuzi nawe atakuzi ngo akubere umujyanama wa Roho yawe. Narinzi impamvu kuko Njye nari muzi, namutoye akiri muto, anyiyegurira akiri muto.

Ikindi mwereka byinshi kandi azi byinshi muri Kiliziya ya Roma y'ubu ngubu. Namuguhaye rero kugirango azavugishe ukuri kuri wowe mu byo yabonye n'amaso ye kuri wowe, asoma, yumva, abwirwa kandi yerekwa. Namuguhaye kuko nashakaga ko ukuri kuzagaragarizwe isi, n'iyo byazatinda.

Ikindi kandi nashakaga kwerekana ko ntaziye u Rwanda n'abanyarwanda gusa, ko naziye isi yose, ko ubutumwa ari ubureba bose.

Rero ko atari bo bonyine bafite ijambo ridakuka, ni yo mpamvu rero nabiteganyije gutyo kugirango batazaguha uwo bashaka ngo agoreke ubutumwa ngutuma akubuza kubuvuga bwose kubera inyungu ze n'abandi nka we.

Ni yo mpamvu bashakaga kuguha uzaburizamo umugambi wanjye ngo ibyo nkubwiye byose ntibivugwe, ntibisohoke. Ni yo mpamvu ugomba kujya ubicisha ku wo naguhaye n'ahandi hose usibye ibanga, ni aho ukuri kugomba gukwira hose. Uwo wari ufite mu Rwanda yaratotejwe kugeza apfuye, baramubujije kuvuga ikikwerekeyeho kugeza apfuye, byose birazimira n'igitabo yarimo kwandika kirazimira bibagirwa ko ukiriho byose bizongera bikavugwa bikandikwa.

Ni yo mpamvu nakubwiye ko ugomba kuvuga ukuri yenda ukazabizira.

Bariya baguhiga buri gihe mu nzira umunsi umwe nzabakoza isoni. Bashatse barekera aho kuko bagorwa n'ubusa, ibyo ngutuma bizasohora byose mwana wanjye. Ngaruke inyuma: Uwo naguhaye namuhisemo muzi, ni yo mpamvu namurinze urupfu umwanzi yari yagambiriye igihe amutera iwe. Nagirango mwereke ko abantu bababaza abandi babaziza ubusa, ibyabo, kubera ishyari ry'ibintu.

Bari bagiye gukoresha intwari zica bari bafite mpita nkomanga ku rugi. Ni Jyewe ubwanjye Yezu wakomanze arafungura umwanzi ariruka, kubera ko mufiteho umugambi.

Ikindi, ibyo bamushinje bamugerekaho harimo ubugambanyi bw'umwanzi shitani isenya aho itubatse, ishaka ko atagera ku cyo yiyemeje ngo ipfukirane ukuri, ariko iribeshya ndi kumwe na we kandi nzi mpamvu bimeze kuriya kuko ntawubona icyo ataruiye.

Ibi mbivugiye kugirango nkubwire ukomeze kumusabira cyane kuko arababara, arababazwa cyane kubera izo mpamvu zose nawe uzi mwana wanjye.

Ndakwibutsa ni inshingano yawe yo gukomeza kubabara usabira Kiliziya y'isi yose.

**Valentine:** Urakoze cyane Papa, ibyo umbwiye ndabyumvise kuko munsobanuriye byinshi ntari nzi cyangwa se nari naribagiwe. Nzajya musabira rwose kurusha uko namusabiraga buri gihe.

Naho ibyerekeye i Roma naho ndasobanukiwe ariko muzongere mumbwire neza uko bikurikirana, ni byinshi kandi byiza.

Ndabyemeye, hakorwe ugushaka kwanyu muri nnyewe. Gusa mbasabye imbaraga no kwihangana n'ubushishozi njye mbibona mbisobanukirwe simbyitiranye n'ibindi nitekerereje nkuko wambwiye ko n'utakubona aba abona ikindi. Sinifuza kubona icyo gishitani.

Ku bwanjye sinabishobora naba mbeshye, ariko turi kumwe ntacyanira.

**Yezu:** Ikindi, ibijyanye n'imiseburo y'inkingo zatewe abantu, ntawe nigeze mbwira ko nohereje umuti w'urukingo, ko bagomba kumvira Kiliziya cyangwa Leta.

Munyumve neza, nababwiye ko umusemburo uwo ari wo wose iyo uwushyize mu kintu kirabyimba, wabamo mwinshi bigaturika.

Ubwo se urumva mu bantu byaragenze gute? Bizagenda gute?

Nababwiye ko atari byiza, mbabwira ko ari ibyogajuru, ko buri muntu wese azahitamo icyo umutima we ushaka. Mbabwira kandi ko abanjye bazahohoterwa nzabarinda.

None se, nabarinda nte kandi bavuga ko nababwiye ko ari umuti? Bagomba kumvira nde ?

Na Mama Bikira Mariya na We yababwiye ko ari ibiza by'ibyogajuru, ahubwo twembi twarababuriye ko ari bibi, ko bizareba umuntu ku giti cye no ku bubasha bwe, ko twe twaje kubaburira cyane cyane abahohotewe ku ngufu babatera iyo miseburo y'inkingo. Uranyumva neza?

Abafite undi bakorera bashaka gushimisha cyangwa gukorera ishimwe no kuboneka neza ntabwo ari twe tubatuma gufasha kurimbura ubwoko bwacu tubicira ubuzima.

Wumvise neza mwana wa!

Hari abavuga ko nta ngaruka zihari ziboneka, zirahari zizaboneka nyuma. Ikindi, ntimwirare, mwirinde kuko imigambi mibi ntiyahagaze iri kwigwaho mu ibanga abantu barangariye mu ntambara bateje. Hazaza n'ibindi birenze ibyo byose ndabikubwiye.

Uzabizira kuko uvuze ukuri kandi bikwitirirwe kuko ari wowe tubonana nkagutuma kugirango uzavuge ukuri, uzamare impaka z'urudaca n'ibinyoma bya bamwe byo kwikuzza bambeshyera ko nabatumye bakivuguruza.

Ikinyoma kirihuta kandi kikemerwa vuba, ukuri kugatinda ariko ntiguhera, mwana wanjye. Humura uzavuge ukuri, uvugishe ukuri, ndi kumwe na we sinzagutererana. Abo muri kumwe na bo musengana uti nimukorere mu kuri, mugendere mu kuri, musenge, mwicuze, mukomere kuri Rozali, Noveni, imyihereho, no gushyira hamwe nk'uko byahozeho Shitani itarivanga mu bantu n'ibintu kuko ni ko gutsinda kwacu, kwanyu, bana banjye.

Muhanire gukorera aheza hera mu ijuru, Na Njye sinzabatererana, bana banjye.

Iki gisibo rero uzagikora bisanzwe nk'abandi bose, wigomwa uko ubyumva kuko ugihoramo kandi uzababara birenze gusiba kurya no kunywa iminsi cumi n'ibiri wamaraga kuva ku ya 9 z'ukwa Gatatu ukageza ku ya 20 z'ukwa Gatatu, mbese uzagikora nk'icyahise umwaka washize.

Uzavugurure amasengesho, imyihereho, musubira mu butumwa mwahawe bwinshi mwibukiranya, kuko harimo ababwibagirwa bakabwitirira abandi, abatazi gusoma, impumyi n'abandi bakarangarira mu bindi.

Abo wababariraga mu kigwi, wahekaga, bazabyumva na bo ko harimo icyahindutse muri bo, n'utunyafu twiyongere aho bari mu bikorwa byabo, mu kazi, mu ngo zabo n'ahandi.

Ni bwo bazumva agaciro k'igisibo wakoraga muri iriya minsi cumi n'ibiri wamaraga ushonje, ufite n'inyota ubahetse mu gusiba kwawe mwana wanjye!

Nkubwiye ibi byose nkwiubusa ibyahise byirengagijwe no kugirango wongere ubone akanya ko kumva uje agusanga ngo umuruhure ku mutima nk'uko byahozeho.

Ubu ukenewe na benshi baremerewe ngo bagusange ubumve, birabaruhura ndabizi kandi ndabibona kuko mba ndi kumwe na we na Njye mbateze amatwi ngo mbafashe binyuze kuri wowe mwana wanjye.

**Valentine:** Urakoze cyane Papa, ndabyumvise nzagerageza kubyubahiriza ariko ntibyoro shyeye n'uku meze.

Gusa nizeye imbaraga za We kuko ku bwanjye ntacyo nageraho, sinabishobora pe. Uziko n'ubundi ndangiza igisibo ndiye gake cyane numva ntabishaka. Numva gusiba nanjye bimfasha kandi nkomeye nishimye. Naho ubushize byaranyobeye n'ubundi sindye nkibagirwa. Umenya ari mwe mubikora singire inzara nkabyibagirwa kuko nyoberwa impamvu kandi ntasibye nk'uko bisanzwe. Papa ndagushimira igihe cyose ko umpora hafi .

**Yezu:** Humura wigira ubwoba, mwana wanjye, byose bizashoboka ndabizi kuko sinagutegeka ibidashoboka.

Ndagutuma ku bantu batuye kuri iyi si banangiye imitima. Harimo abategetsi ba Kiliziya, harimo abategetsi ba Leta, harimo abakristu, harimo n'abategekwa bese. Nimudaca bugufi mwese ngo mugendere mu kuri, mukorere mu kuri, musengane ukuri, mutegekane ukuri n'urukundo, muzaterwa mutiteguye kandi mwese muzagwa mw'icuraburindi.

Isi izabashiriraho kuko mutazi umunsi n'igihe cy'imperuka, mbese igihe Data wo mw'ijuru azazira gucira imanza ababi n'abeza.

Ntimuzavuge ko mutunguwe kuko mwarategujwe na n'ubu ni byo ndi gukora. Ndababuriye nimwisubireho igihe kitararenga .

Ngibyo ibyari binzanye kukubwira mwana wanjye. Ngaho vuga aya masengesho nguhe umugisha wanjye:

Dawe uri mw'ijuru (x3),

Ndakuramutsa Mariya,

Hubahwe Imana Data.

Nguhaye umugisha Wanjye kw'izina ry'Imana Data na Mwana na Roho Mutagatifu. Amina.

Ngaho komereza amasengesho yawe aho wari ugeze. Uramukeho, mwana wanjye.

**Valentine:** Urakoze cyane, Papa. Uramukeho.